

寧晉縣志

周鳳翔
題簽



藝文志中

卷之十

碑記
文
傳

寧晉縣志卷之十

藝文志中

碑記

唐癭陶令李懷仁德政碑

失名

夫緝懿德以升榮必凝範于金冊總徽圖而闡化亦昭茂
于丹青將以矯獎翻訛匡風正物求諸曩烈允歸良宰況
乎宸樞委躍載誕宗英屈市邱之重就烹鱗之任而能勵
心政術克著清猷吞賈鄭于胷懷碩周韓于掌握信可以
騰芬琬璵璠○將來者焉君諱懷仁字郎○隴西狄道人世
祖元皇帝曾孫太宗文皇帝之族子也自黃軒御歷○帝

乘時踈瓊構于繇代渙璇源于遙祀月魄摘祥庭堅之德
斯勸星精委貺伯陽之道攸高靈慶所鍾神功乃暢撫三
才而纘統允叶龍圖敷九族以垂風載光麟趾華宗景胄
可得稱乎○祖湛贈蜀○迪行○和砥名○道北宮之德
雖厚西燎之光不借父義持節丹松商恒四州刺史使持
節督都丹州松州商州恒州等州諸軍事恒州刺史徵拜
宗正卿轉左驍衛大將軍上國柱隲西郡公英姿鳳峙逸
舉鴻騫行不悖物言必以信出總六條入叅九棘戎機斯
要載奉鈞陳忠肅之誠見稱○警矣商岑薦祉渭川澄祐
稟靈和之氣挺韶茂之姿始自襁辰已見克岐之美迨乎

昨日更標通理之稱亦猶同山之羽先彰五色渥水之駒
早聞千里豐池孕寶紫氣遙浮楚岫銜珍白虹孤映若乃
韞器清朗植性溫嚴磨而匪磷撓而不濁忠孝之道無待
化成仁義之方率由斯至雖聯華帝室毓景○門而謙恭
肅慮若在○谷不宣驕而傲物豈恃貴以誇時言則循憲
動必由禮幼而聰敏備覽羣籍偃書林而歛寶激詞河而
吐潤貞觀元年○○○○○後降封陳留縣開國公
食邑一千石錫社分茅乃尊周冊誓河疏邑爰依漢典爵
窮上等名貫通侯發以聲明紀之文物朝廷以今之長吏
古之諸侯任總一同寄深百里況全趙之地是曰大邦鳴

絃軌俗實資良彥永徽元年以宗室子弟勅授朝儀郎行
廩陶縣令晉稱揚國魏曰廩遙近控槐川旁通寢水封城
舊址即帶常山歷鄉餘基還分鉅鹿趙肅之王○美化猶傳
廣川○之裔清規未遠君來軺涖境○銅○職宏制錦之
術取芬絲之義不言而教道德齊禮法令為師勝殘去殺
而以為政之本學校居先阜俗之原耕桑是務于是敦勵
鄉党蠶塾俱開勸相農時田疇盡闢于襟之侶遠同洙泗
歲取之積近譬京坻至于穿窬○○棄業遊手探丸之客
剝鼓之首咸仰仁明變其流獮市無竊盜路多縣寶鳴桴
既靜犴獄恒空彈絃跼蹐之家復遵貞道剽奪椎埋之豎

更同醇懿若夫孤老疾恙惇釐貧竭烟火不舉資費靡依
親勸富豪均為周贍衣食畢繼成無凍餒徭賦凋卹斷自
經懷揣其重輕量其遠邇牽而弗擾勞而靡怨而以士女
攸居郭邑為重商旅所湊闐闐斯忉而地惟鹵濕垣巷多
毀農事之餘漸勸營構脩衢啞直列肆星羅崇墉窅藹飛
甍隱○通渠亘陌長槐結陰百姓相驩靡弗稱賴亦猶齋
茅荷竹無煩堂邑之畝導隰疏原有濟滎陽之俗子何之
功既峻元祚之政為優較而言焉我亦奚愧界乃有狸乳
鼠麥秀八岐暴獸成狸徒彰昔美兩岐興瑞空結前謠未
有乳字之奇薤穎之異超今絕古掩牒○圖雖天降休貞

本符昌歷而產于縣境良由善政不有聖朝孰任明宰不
有嘉應何表能官豈若祥鷹變質獨紀瑕邱之化碩木擢
秀空顯中年之德逮媿于此彼固非美合縣道俗等道存
名教情摠典律咸棲義募並浴儒津以為盛德必彰既形
之於舞咏徽風載洽亦播之于鑪管言武城之小善尚著
歌謠董涇昌之微功猶堪碑頌况我君英規允暢惠化旁
流道□軼翁卿仁躋沙穆焉可使丹書靡紀翠碣無聞者
爰試謏○式揚令範金石終毀鏗鏗之響何傳蘭菊可消
靡靡之芳無紀乃為頌

元寧晉縣

達魯火赤字兒罕
忽里公去思碑畧

真定路趙州儒
學教授張榮祖

竊詳達魯火赤之職位處令土縣巨細靡不主領聖朝垂
統專重此選上則路府諸司下及郡邑一一備設而是處
其最是用握持國制綱領百司為路郡縣之首也孛兒罕
忽里公其先畏吾兒氏族官居真定因家焉祖宗以來簪
裳闕闕撒里脫本路斷事父闊里伯樞本路宣課副使公
至元丙戌十月初涖任省風俗觀治否杜私謁却饋獻弗
接邪佞平理冤抑數月間措治歸一宣聖廟荒廢兩廡甫
創未完公接續經營之至元戊子夏四月旱封城鄉數村
螟螣生發民心怵怵公不殫劬勞親為捕治歲乃大熟至
元壬午之饑飄泊離析起食河南上文磨勘闕四百戶居

者苦於代輸不勝困憊公亟為招徠皆復業縣當趙郡之
左屬雖有七差徭及諸造作無不倍於六縣公凡百皆為
預置後使民知民以是不被督責至若申嚴官府感激吏
民導揚風化勉勵學校豈容縷數惟是柔不茹剛不吐鯨
寡不侮強禦不畏惟公獨近之政荒令弛惟公能振之巨
奸宿猾惟公能去之顛仆傾覆惟公能興之擾民舊弊惟
公能革之生民災害惟公能殄之流移離析惟公能復之
磨骨相誣惟公能辨之臨官蒞事之間敏決簡當折人應
變之際才識精明皆公天資之優難可學而至也公去十
有餘年民咸稱詠邑耆宿管才李思忠董璉者三十餘○

叩予為書用告來哲予因述其政而勉為論次之

縣令徐侯重修廟學記

武邑教諭曹安

洪惟我太祖高皇帝定鼎之初首正祀典詔天下應祀之神皆如古制盡革從來瀆禮亂經之弊獨以孔子明先王之道垂教萬世非有功于一時一方者比歷代加封爵號存而弗易建廟以奉祀建學以儲材尊師重道歷代所弗能及而育賢之心猶天地之育物也士生斯世何其幸歟今上皇帝嘗增文廟邊豆樂舞之數又嘗於孔林增新廟宇遣重臣致祭豈惟孔子之後有所感激而凡天下之士莫不感發興起願學孔子以求見用於時長山徐侯以貞

由名進士奉命來知縣事即以興學為意伐材於林取礪
於山工既集以丁艱去服闋父老懷侯之德詣闕奏保上
允之俾乃舊職既至日夜殫心畢慮百事區畫以其所積
市學前民地東西南北各五十餘步沙汰瓦礫以拓其址
建大成殿五間兩廡四十間重塑先聖四配十哲及兩廡
諸賢像立櫺星戟門學門引泉為泮池甃以文石上架石
梁重新明倫堂兩齋文昌祠會饌有堂講書有所肄業有
號與夫齋宿庖廚庫甓堦城之屬井然不紊範銅為鑪塗
朱為几黝堊丹漆金碧輝映盡北畿之廟學蓋未有過之
者經始於成化甲辰冬訖工於乙巳秋以用白金計者千

用工匠夫役計者萬用財莫知其出役民不知其勞是皆
侯一心運籌之至而凡先後經營布置不爽錙銖其用心
至矣盡矣董其役者主簿黃君越與夫典史高君能相其
成者教諭朱君輔訓導宋君奎史君譔一日真定郡守公
餘蒞止睹廟學之成俾安記之侯之興學迹美前人所以
宣上德意陶鎔士類化導民俗皆原於此非知所先務者
乎士之於學也必藏修游息庶不負聖朝作養之恩與夫
侯興學之美也云爾

縣令陸侯德政碑略

侍講吉水彭教

寧晉縣令陸愉字以和世為蘇之嘉定人侯循用古道修

舉廢墜於學宮之敝陋則新其規制善於化導鼓篋者無
惰業於田野之荒蕪則正其經界善於勸課舉趾者無廢
時流移者則善於勞來而蠲其徭役梵獨者則善於撫字
而賑貸有常剽刼蝟興善禦以方而民生日寧詞訟蠹起
善聽以公而民偽日沮年屢饑饉侯則抗文請蠲或謂時
多事恐獲罪侯曰為人臣者豈不知朝廷事哉但吾民疾
苦尤切於身更加以徵求則皆委於溝壑當力言之雖咎
弗辭也上竟允其請民多全活歲繼旱蝗侯則齋沐以禱
或謂鬼神難知無益侯曰為人上者豈不以民瘼患哉雖
幽明不同可以誠格若坐視其事則以越而視秦當知禱

之雖勞弗恤也蝗亦尋滅是非善於救災者乎縣廳久燬
侯則重建之民莫知其財用之費河久淤塞侯則疏淪之
民陰受其灌溉之利至於修壇墀以重祀典固城池以禦
外侮作輿梁以通往來凡其舉措施設良法美意雖民猶
不獲盡知奚能為之縷析哉

縣令方侯去思碑

學士白鉞

以去思名碑紀民志也人情不能無好惡而毀譽隨之毀
易譽難十人譽之而不足一人毀之而有餘矣三代之時
渾噩為俗惟善是依不見其迹下此則剛毅者名為悍暴
慈恕者指為異懦不亦難乎若有舉千萬人之辭猶一口

去十數年之久猶一日亦可見天理民彝之未泯而實惠
浹人者自不可忘也寧晉耆老江聰韓騷唐贊宋卿輩不
遠千里詣京師言於予曰走之邑於執事為隣壤真定之
屬民俗產阜在雄繁之次前之為政或以幹清稱或以操
守著民固恃賴寧厥居然欲勒之金石垂之不朽非惟走
輩所不能抑恐不足取信於後世而重誣矣若吾方侯之
去思不見諸登載不仁不明之罪端有所歸走輩用是懼
方侯之始視篆也維嚴厲之後惕然若有所懲雖紀綱條
約森布張列益密於前而惻怛之意恒寓於臨民之際以
致豪霸畏威而不敢肆柔良懷惠而遂其安侯知民之信

也於是疏其當務之政大小緩急無遺按籍而舉置之首先風化重修廟學鼎建兩廡程督有方往往因科第顯以農桑為生民本勞來勸導躬歷阡陌不殫勤勩無耕播具者為之措置助其乏缺流徙者咸樂還業凡增丁口一千八百有奇還業通戶周寬等一百一十戶有奇栽植桑棗一萬六千三百有奇勸出倉糧四萬六千有奇賑濟饑民范英等一萬二千名口有奇助葬勸婚劉澤張元等一百二十二人平反審覆重獄郭榮等五十八事以至訟獄之平賊盜之弭軍匠之清廩庾之創章章在人耳目威惠之兼政教之舉蓋有走輦耄齒所未覩者方侯去任已數年

非惟老壯愚哲思之不置雖頑梗骯法嘗遭鋤擊者亦莫不由又安得所謂方侯者哉走輩稚魯於侯化導之切擿發之奇訥不能形容然大概具是聞執事雅重許與傳必信敢礮石以請願執事其無辭予曰是則然矣方侯美政誠如若輩言漢之循吏何以加諸特遷固之雄詞健筆鋪張鼓盪能動衆聽世豈乏斯人哉顧執鉛槧者何如耳予不佞不文而若輩語實皆可書庶幾無愧於古無疑於今而無敝於後也方侯名榮字士華杭之錢塘人登甲辰進士今擢監察御史顯融於此始云

縣令陳侯重修廟學記

祭酒新鄭高拱